

Date – 13/04/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Tukin dar 7:00 atang khan Aizawl Municipal Corporation-AMC inthlan atana polling station pan theilo te Home Voting kalpui tan a ni.
2. Vawiin khan Lungdai Venglai-a chhungkaw pakhat chu an in chhungah thi chhawngin hmuh an ni a, an fanu a lo thi hman tawh.
3. Prime Minister Narendra Modia chaun ramchhung hmeichhiate theihna chuan nasa takin hma a sawn a ti
4. UK Prime Minister Keir Starmer chaun US kaihhruaia Strait of Hormuz dan tumnaah British an inrawlh dawn lo a ti



HOME VOTING

Tukin dar 7:00 atang khan Aizawl Municipal Corporation-AMC inthlan atana kum upa te, damlo natna khirh bik nei polling station pan theilo te leh pianphung a rualbanlo polling station pan theilo te tana a vote thlak theihna tura ruahman, Home Voting chu kalpui tan a ni a. Home Voting hi ningani thleng kalpui tura ruahman a ni.

Home Voting ni hmasa ber tukin dar 6:00 khan District Election Officer's Office, Aizawl atang in vote thlakna tur EVM leh hmanraw dangte Municipal Ward tin te Municipal Returning Officers (MROs) ten General Observer hriatpuina in Strong Room atangin an pechhuak a.

Home Voting hi AMC Ward 19-ah kalpui vek tur a ni a, Ward tinah Home Voting Team pakhat theuh awm in, Home Voting ti tura dilna lut zat hi 2769 a ni a, ni 4 chhung a vote thlak hi zawh hman tura ruahman a ni, Municipal Ward – 2 ah dilna hi lut tamber in diltu mi 209 an awm a ni.

Tukin a Home Voting Team tihchhuahnaah hian General Observer te, DEO aiawh Election Officer te, Ward tin MRO leh AMRO te, Home Voting Nodal Officer te, EVM Nodal Officer te, Information & Publicity Nodal Officer te leh Political Party aiawh te an tel a ni.

Hriat theih chinah vawiin Home Voting a, Vote thlak upa ber chu Pi Nghakliani, Kum 102, Dawrpui veng, Ward-IX hnuai a mi a ni.



MNF/ZPM ISSUE

ZPM Thalaiten Aizawl Bawngkawna AMC Sport Complex enho tura MNF Thalai an sawm hnuah vawiin khan a hran ve ve in helai hmun hi an enfiah.

MNF Thalaite hian an President Pu Robert Romawia Royte MLA hovin zing dar 7-ah AMC Sport Complex hi an enfiah laiin, ZPM Thalaite chuan chawhnu dar 2 khan an enfiah thung a; MNF Thalai President Pu Robert Romawia Royte chuan, ZPM Thalaiten AMC Sport Complex enfiah ho hun tur ruat tura an tih angin tukin zing dar 7 chu enho hun atan an ruat a , hetihlaia ZPM Thalaiten zingkara enho duh loa chhun lama enho an duh zawk chu mak a tih thu a sawi.

Pu Robert Romawia chuan, Bawngkawna AMC field leh a bul kawngpui siam te, pavillion leh tui litre nuai 4 leng zêmliam siam te, khelmual tihzauh te, tui luankawr leh mipui thutna siam te, a hungna bakah PCC road siamte hi a hunlaia AMC Engineer te bakah Bawngkawna LC te, GSA te leh Welfare-te enpuinaa thawh a nih thu a sawi a; thil fel lo a awm ti te tan chuan ACB emaw, CBI emaw, LokAyukta-ah emaw kal mai tur a nih thu a sawi.

ZPM Thalai president Pu Jeje Lalpekhluah chuan party 2 ringawtin zingkara an enho chuan inhnialna bak a awm dawn loh avangin chhun lamah media mite, khawtlang hruaitute leh mithiamte nen enho an duh thu a sawi thung a; AMC Sport Complex boruak chu AMC inthlan campaign nen inkaihhnawihna a neih loh thu a sawi a; thil a nihna tak hai lan an duh avangin enhopui turin third party lamte leh khawtlang hruaitute an sawm tih sawiin, hemi chungchangah hian a lehlam party-te pawh thil tha turah chuan hmun khata awm ho a that thu leh thil tih a nih dawn chuan party game-a laka inchirhthelna atana hmang lova tih ho tha an tih thu a sawi.



LUNGDAI

Vawiin khan Lungdai Venglai-a khawsa chhungkaw pakhat chu an in chhungah thi chhawngin hmuh an ni a, an fanu Priskil Vanlalhriatpuii kum 14 mi chu alo thi hman tawh a ni.

Lungdai atanga kan corr thudawn danin, chhungkaw nu ber Pi Lalremsangi kum 35, Lungdai Venglai chu pasal a boral hnu in a fate pahnih Priskil Vanlalhriatpuii leh Austine Vanlalmalsawma kum 11 mi te nen mi in hnuai luahin an khawsa a; tukin ah an thawh har em avangin an thenawmte ngaih tha lo chuan dar 11 rik hma deuh khan an kawngkhar tichhia-in an lut a, Pi Lalremsangi leh a fapa hi chau takin an hmu a, an fanu erawh alo boral hman tawh a ni.

Pi Lalremsangi leh a fapa hi Lungdai PHC panpui nghal an nih hnuah a Synod Hospital Durtlang-ah hruai anni a, hemi hnu hian Falkawna ZMC &H ah enkawl an ni a, Pi Remsangi hi Ventilator hmanga enkawl niin, a fapa erawh chu Damdawi hmanga enkawl ani.

Priskil Vanlalhriatpuii hi High School kal lai, Pawl 9zirlai niin, tukin khan a thiante chuan School kal tura sawm an tum a; an kaihthawh zawh loh avangin an kal san ni a thudawn a ni a, a ruang hi Lungdai PHC-ah Postmortem anih hnu in naktukah Zanlawn-ah vui a ni ang.

Chhiatna thlenna In hi Police ten an enfiah nghal a, misual kut tuar emaw rinhlelh tur a awm lo niin an sawi a; chhiatna thlen chhan tak hi hriat theih a la ni rih lo a, rindan thuthangah chuan inchhung phui taka an meilum ai lai meihawl khu in boruak chhia a siam vang a ni thei an ti a ni.

<><><>

MPCC PRESS CONF

Congress Pary chuan Mizorama buhfai supply tu thahnem tak zingah sorkarin buhfai supply tura a thlan LZ Juice chu sum siamna atana a bika ruahman lawk sa niin a lang an ti.

Mizoram Pradesh Congress Committee Vigilance Cell vice chairman Pu R Vanlalvena chuan vawiin khan Aizawl Press Club-ah thuthar thehdarhtute kawmin, ZPM sorkar hnuai buhfai supply tura thlan LZ Juice in Mizoram mipui tana buhfai a supply danah thil dik lo tam tak a awm a; hemi chungchangah hian Lok Ayukta-ah a rangthei ang berin complain thehluh an tum tih a sawi a ni.

ZPM sorkarin buhfai Grade 'A' supply tura a thlan LZ Juice chuan buhfai supply tur an leina Suhana Enterprise, Assam hnen atangin Grade 'A' buhfai ni loin, buhfai man tlawm (common rice) Grade 'C' ngei an lei tih an finfiah thu sawiin, hei hi mipuite zah lohna lian tak a ni, a ti a. Buhfai supply-na challan leh lirthei in mil lo engemaw zat a awm thu sawiin Pu R. Vanlalvena chuan, challan a motor number inziak, mahse, chhui chian hnuai motor registration record awm lo buhfai phur motot tam tak hmuh chhuah a nih thu a sawi bawk a, heng motor an chhui te hi auto rickshaw, jcb, bike, car leh leh motor te dang te an ni a ti.

((BYTE - MPCC Vigilane Cell Vice Chairman))

MPCC Vigilance Committe hruaitute chuan, Zuangtui Muanna Godown a buhfai phurhluh dan an enfiahnaah, thawktute chuan lirthei lut reng reng uluk taka endik anih thu leh buhfai te pawh buk nawn vek anih thu an sawi si avangin, LZ Juice te hian thuneitu sang duhsakna an dawng bik anih loh chuan Godown a buhfai an phurhluh dan chu thawktuten an lo pawm theih dan a awm lo an ti a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Chanchinthar hi naktuk zing dar 7 leh a chanve-ah puan leh a ni ang.

<><><>

PM NARI SHAKTI

Prime Minister Narendra Modia chaun ramchhung hmeichhiate theihna chuan nasa takin hma a sawn a ti. Vawiina hmeichhiate dinhmun chawikan chugnchanga New Delhi-a Nari Shakti Vandan Sammelan-ah he thu hi sawiin hmeichhiate dinhmun chawikan anih theih nan mitin tangrual turin a sawm a. Parliament pawhin hun chhinchhiahtlak tak a hmabak tih sawiin State Assembly atanga Parliament

thlenga hmeichiate tana seat hauhsak chungchang sawihoin tun thla ni 16,17, leh 18 ah hian an thukhawm dawn tih a sawi a ni.



UK PM

UK Prime Minister Keir Starmer chaun US kaihhruaia Strait of Hormuz dan tumnaah British an inrawlh dawn lo a ti. Pu Starmer hian helai lawng veivahna hmun pawimawh tak hi ralmuang taka lawngte an kal tlang a duh thu leh inepna boruak tih sosanna hmanrua atan hman a duh lo a ti a. Iran buainaah UK hnuh luh ve an rem ti lo a ti. PM Starmer hian US Central Command (CENTCOM) ten Iran chhehvela lawng chetvel dan a khuahkhirh dawn tih a puan hnua Iran-in Persian Gulf leh Gulf of Oman na taka beiha a vau hnua hetiang hian thuchhuah a siam a. Pu Starmer-a chuan a thawhpuite nen Strait of Hormuz-ah buaina awm lova lawng an chetvel theih nan an indawr reng tih a sawi a. Hetianga Strait of Hormuz-a khuahkhirhna siam hian khawvel pumah nghawng na tak a nei dawn tih a sawi a ni.

